



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 8

Tanabuba Demonetisation ya aibelen miimbangtsü atema asü?: Karge

Nüngtugu badminton asayar Chen Long asaya nungi anener

VOL. XX NO. 218 (ADOK 218) DIMAPUR AMUNGNÜ (SUNDAY)

MONUPII (MAY) 21, 2023

₹ 5.00

## Manipur nung internet service shibangba melapoker Congress-i Centre aser state sorkartem aitsür

**Imphal, May 20, 2023**

**(Agencies):** Manipur nung tesüiba anogo 18 tashi mobile internet service shibangba ajanga banking, government aser non-government services nung tetsükdaktsü tulu ajuruogo.

May 3 nü Manipur kübok district 10 tema nung kin o kin tsüingda rara adokba sülen Manipur sorkari mobile internet shibang.

Manipur nung tang nüngdakbatem aser totzü den mozütem manguba dang masü saka internet shibangba ajanga banking aser ATM facilities nung timtem jenti ajurur.

Manipur nung Opposition Congress, media aser lokti balalai internet service lapoktsü takhangba agüja arur.

"Temeim Prime Minister Narendra Modi yimlibilema Manipur nung internet noktanga agienang. Tanü May 20 lir. May 3 nungi internet shibanga lir. Tanü Digital India nung ni nü indang mesüra Amit Shah'er tweets mezüngteter. Kodang PMO-i Manipur nungger ajak atema internet lapoktsütsü?" ta Manipur Congress spokesperson Ningombam Bupenda Meitei-i metetdaktsü.

"Manipur nung banking, e-commerce, payments of e-bills, e-tickets, businesses, work from home, education aser tanga essential services aika meinyakteter" ta Union minister and Congress General Secretary Jairam Ramesh-ia metetdakja

liasü.

"Külen, Prime Minister-i yimjung alitsü temepishiba indang olung ka danga mesangoktsü lir. Union Home Minister mesüra tanga Cabinet Minister kati danga Manipur mesemdang" ta Jairam Ramesh-isa ashi.

Taoba central minister Mukul Wasnik-i anir AICC telok kati anogo asemnü tashi Manipur semdangogo aser parnoki tensa asadang.

"Sorkari Manipur nung tensa süngjemtsü merangba kecha mangur" ta Honibarnü Delhi-i maodang Wasnik-i ashi.

"State aser Central sorkartemi Manipur nung tensa süngjemtsüla. Manipur timtemba mapang aser state litsü lemsatsüsa tensa ka nung Prime Minister aser Home Minister nati ola madokba aitsür" ta paisa metetdaktsü.

May 3 nü lendong atalokba sülen Union minister kati danga Manipur mesemdang. Iba tatalokba nung Kuki telungpurtemi shilem agiba onoki ajitetogo, ta Wasnik-isa shisem.

AICC teloki Congress lennirtem dang Manipur tensa indang osang ka agütsütsü.

Taoba Central minister aser Bihar, Mizoram o Manipur Congress in-charge Bhakta Charan Das, Manipur Congress President K. Meghachandra Singh aser asemben tashi Chief Minister inyaker Okram Ibobi Singh nungeri AICC telok meina senzü.

## CANSSEA Central Unit-i Wokha district semdang

**Dimapur, May 20, 2023 (TYO):** CANSSEA Central Unit-i Honibarnü Wokha district semdang aser Deputy Commissioner Conference hall nung district ktdangsurtem den senden ka amen.

CANSSEA Central Unit ya Vice President Zubemo Tsanglao aser Press & Information Secretary Siewatho Nyusou nati anir liasü.

CANSSEA Central Unit-i Wokha semdangba ya district ktdangsurtem den ajurutepa sensaksemtsü aser state sorkar mapa inyakerter indang CMHIS, NPS den ano DAs/ADAs amala onük tongtipang lemsateptsü atema liasü.

Parnoki tekaratiba nung Wokha District CANSSEA Unit re-organization/formation asütsü atema mepishi.

## Kohima gari lendong nung 1 asü, 8 yiru

**Kohima, May 20, 2023 (TYO):** Honibarnü Phesama nung FCI Godown anasa gari lendong ka atalokdang nisung 1 asü aser 8 yiru.

Scorpio ka nung nisung 9 mener Imphal leni aodang lungren ka nung ia tsükok. Phesama nung FCI Godown ajangli iba lendong atalok, gari nung Nepali nungger teimba mena liasü ta police-i ashi.

Lendong atalokba osang angashiba sülen iba lenmang ajanga senzürtem aser yimdaklirtemi teyirurtem Bethel

Hospital-i anir ao saka tantsür ka asü ta police-isa metetdaktsü.

Iba lendong nung kanga mejungi yirur nisung pezü ICU nung lir aser terara yirur pezü mozü kidang nungi anizükogo ta parnokisa ashi.

Iba lendong ya komaser atalok jangjatsü atema bushisüngdang südar ta police-isa shisem.

Külen, Kohima nung aliba kinungertemi ashiba agi parnok ya Nepal nung kiyimba sentong ka nung dennür meyipa arudang lendong ajuru.

## Sorkari SC akhümtsübur saka public-i rongshiba ajanga NMA 2001 agien

**Kohima, May 20, 2023 (TYO):** Supreme Court-i May 16 tashi nung Urban Local Bodies (ULBs) indang election agitsü tuyuba State Assembly-i tashi anga saka civil societies-i rongshiba ajanga Nagaland Municipal Act 2001 (NMA) agien.

Iba osang ya Honibarnü Advisor to Chief Minister aser Investment & Development Authority of Nagaland Chairman Abu Metha-i metetdaktsü.

Nagaland state sorkari

Supreme Court tangatetba akhümtsübur aser parnoki tuyuba sülen anidaka aru saka civil society organizations-i ashiba nung ajemdaker state assembly-i iba lemtet agitsüsa aküm, ta Abu Metha-i ashi.

Sorkari sendaktepa alirtem aser civil society organizations den osang agitepar aser maneni nübor ajak den iba onük lemsateptsü ta paisa ashi.

Tebilemba ajak angadangtsü aser külem nükjidong tonga

inyaktsü atema iba mapa inyaker, ta Metha-isa shisem.

Supreme Court-i linük nung ozüng sülen anidaktsü indang shiogo saka SC-i Centre sorkari telangzüba agütsütsü atema mapang talila agütsüsemogo, ta paisa metetdaktsü.

Osangbenertemi taküm municipal elections agitsü asü ta asüngdangdang "iba ken o ya okadak benoka lir anungji tangbo kecha meshitetsü" ta Abu Metha-i langzü.

## Dimapur nung "Reduce, Reuse, Recycle (RRR)" campaign tenzüker

**Dimapur, May 20, 2023 (TYO):** Honibarnü Dimapur nung "Reduce, Reuse, Recycle (RRR)" campaign tenzüker.

Iba sentong ya Ministry of Housing and Urban Affairs kübok Swachh Bharat Mission 2.0 nung shilem ka lir aser "Meri Life Mera Swach Shehar" omen nung ajemdaker agir.

May 20, 2023 nü DDSC stadium nung DMC administrator W Manpai Phom-i iba campaign tenzüksü.

Hopta asem campaign ya June 5 World Environment Day nung tembangtsü aser idangji 'clean and sustainable

environment' tezüngzüktep agitsü, ta pai ashi.

"Iba campaign nung RRR Centres lapoktsü aser idakji sensotemi süoshi, tsüngsem, kaket, kazüzi, newspaper aser plastic (excluding single use plastic) amala tenlatsü akok" ta Manpai Phom-isa ashi.

DMC telongtet kübok colony ajak nung RRR Centre lapoktsü aser ward ajak nung colony shiai RRR Centre lapoktsü osang agütsütsüla. Iba tetoktepa ya May 20 nungi June 3 tashi agitsü aser June 6 nü results sangdongtsü ta paisa metetdaktsü.

Takok angur nem senpet den kulikaket agütsütsü saka iba ya sen atema masü saka ward level nung waste management tajungba inyaktsüba indang asütsüla, ta DMC Administrator-isa ayongzüker.

RRR campaign ya kanga tajung aser iba ajanga asenoki lipoküm wazüka yutetsü ta Naga Women Hoho Dimapur president Neinu Kire-i ashi.

"Sorkar sentong tajung atongogo aser iba ajanga osang prokshiba dang masü saka nübortemi yimya tajung beshitsü tangatetba agütsütsü" ta lai ashi.

## Assam nung tesayurtem atema 'dress code' metetdaktsür

**Guwahati, May 20, 2023 (Agencies):** Assam state education department-i shisaliok rejutem nung tesayurtem subsolemsü indang tetuyuba ka agütsüogo.

May 20, 2023 nü Education department-i dress code metetdaktsüba nung tesayurtemi jeans, t-shirts aser leggings masemtsü shia lir.

"Shisaliok reju kar nung tesayurtemi pei pei mulungba süoshi asemer ta onok nem osang sangoktsüogo. Tesayur kari

public-i maginüba süoshi asemer. Tesayur kari yimyatsüya tajung asütsüla anungji dress code ka sülen anidaktsü nungdak kümogo" ta Department of School Education-i sangdong ka nung metetdaktsü.

Assam nung shisaliok reju ajak nung tesayurtem atema tsünglanglen agüja aliba dress code metetdaktsür ta Department-isa ashi.

Tebur tesayurtemi Formal Attire agitsüla (T-Shirt, Jeans amala Casual Attire masü saka

Formal Shirt-Pant)

Tetsür tesayurtemi T-Shirt, Jeans, Leggings amala Casual Attire masü saka decent Salwar Suit/Saree/Mekhela-Chador agitsüla.

Tebur aser tetsür tesayur ajaki merükmejua, süngjema aser sentsü tajung süoshitem agitsüla. Casual aser party süoshitem khenyongi magitsüla ta Department of School Education-isa metetdaktsü aser aibelenertem dak disciplinary action agitsü ta parnokisa shisem.

## Khonoma nung lanur benjung-Thekranyi among

**Kohima, May 20, 2023 (TYO):** Nagaland nung mezüngbuba green village Khonoma nung Thekhanyi benjung mongogo.

Lanurtem indang benjung ya "Excelling in the 21st Century" omen nung ajemdaker among aser Advisor to Chief Minister & Investment & Development Authority of Nagaland Chairman Abu Metha-i alakteta jaoker ka ama shilem agia liasü.

"Sorkar indang alizüngji nisung ajak renlokdaaktsütsü aser tejakleni odaktsütsü atema lir. Nagaland sorkari nübortem taginübatem atongtsü atema maneni inyaktsü aser Chief Minister Neiphiu Rio lenisüba kübok sorkari tim nisung nem tim mapa lezmükja ktdangtsü arur" ta Abu Metha-i ashi.

"Alima ya kanga kara tejakleni

aoer aser anogoshia technology renloka aoer. Tanü shia metetba ya tashi lir anungji quality education sayutsüla aser iba ajanga dang tayongzükbatem kokteta otettsü" ta pai omen indang olen ka ashi.

Paisa social media sabangtem tajungleni amshitsü aser kuli tejangja memeteti social media posts mebelenshitsü ayongzüker.

"Nagaland ya India, China, ASEAN countries aser Bangladesh ajanga meketbanga lir aser item linük rongnung alima nung rongsenketzüng renlokba linük kar lir. Anungji Nagaland nung alirtemi item maongkatem agitsüla aser rongsenketzüng jenjang melenshiba nung shilem agitsüla" ta Metha-isa metetdaktsü.

nung terenlok mali lir ajisüka Tenyimi nungger aser talisa Angami nungger ya state yimtiba nung alirtem anungji state tiyongtsü nung alirtem aser tedi tambusang ama züngshir, ta paisa ashi.

Anungji Angami nunggeri tambusang ama tangar asoshi bendanga agütsütsüla aser kibong ka ama külemi aotsüla, ta Metha-isa ayongzüker.

"Tanü Naga loktiliba ya telongjem atema inyaktsüla aser lanuputu len anitsüpur lennirtem ajungkettsüla" ta paisa ashi.

Iba benjung nung Youth Resources and Sports Advisor Keoshu Yimchunger-ia salem osang lemsatep aser Khonoma nunggeri Nagaland nung mezüngbuba tetsür minister adokdaktsüba atema tenüngsang agitsü.

## Mokokchung DPDB senden menogo



Advisor, Water Resources & Chairman DPDB, Mokokchung, Tongpang Ozukum, den Legislator tem aser züngsemtem District Planning and Development Board (DPDB) senden nung sensaksemba mapang tangokba noksa nung angur.

**Dimapur, Monupii/May 20 (TYO):** Itashia amenba Mokokchung District Planning and Development Board (DPDB) senden May 20 nü Advisor, Water Resources & Chairman DPDB, Mokokchung, Tongpang Ozukum lenisüba nung Deputy Commissioner Conference Hall nung menogo.

Advisor, IPR, Soil & Water Conservation, Imkong L. Imchen, Advisor, Law & Justice, Land Revenue, T. N. Mannen, Advisor, Fishery & Aquatic Resources, A. Pangjung Jamir, Advisor, Minority Affairs & Sericulture, Imkongmar aser Advisor, Transport & Technical Education, Temjenmenba nung jak iba senden nung dena liasü.

Legislators aser DPDB züngsemtem pelashishia agizükba mapang mendenubai, tawa tembangba General Election yimjung nung kecha tetsükdaktsü makai katetba atema district Administration, Police, Office balala tekolaktem aser lokti tentet balala dang kanga pelaba lemsatapa liasü.

Mokokchung jila nung

tebilemstü tulutiba rongnung kaji tzü agi anüngba ya lir, aser senden nung iba onük ya benoka sensaksemba liasü. Iba tebilemstü ya ken o dak sendaka aliba department kijai mebenettetsü ta angateta iba tebilemstü bentettsü atema water management dak sendakba nung nüburtem nem tangazükba agütsütsü asoshi jenjang tapet agitsü aser ano iba ken o sensak asemstü asoshi Line Department tem senden amentsü aser tzüpokdak mesemshitsü atema telemtetba agia liasü. Iba dak sendakba nung DPDB mendenubai Deputy Commissioner & Vice Chairman, DPDB Mokokchung dang Line department ajak senden ka ayongzüka amentsü asoshi mepeshia liasü.

Senden nungsa district nung Urban Development Officer maliba ajanga terenlok maparen balala benoka minyaktetba indang sensaksemba liasü. Ken o dak sendakba nung züngsemtemi takaratiba nung Mokokchung-i Urban Development Officer ka shimer yoktsü atema department dangi abentsü asoshi telemtetba agia

liasü.

Maneni board-i society tasen; Green Hills Research and Development, Ungma village züngoksemtü asoshi benoktsü aser Mission School Changki, Straightway Higher Secondary School, Mokokchung aser Town higher Secondary School, Mokokchung nem teyari agütsütsü lemtet.

Senden nungsa PMJVY kübok Yimchalu yimtsüng nung Tourist Amenity Centre ka yanglutsü atema agizüka liasü.

Kasa mapang nung Elder Line, Nagaland dak sendakba nung Programme Manager-i Power Point presentation ka agütsü, LADP 2021-2022 mapang Common Pool kübok Livelihood Project benoka inyakba indang osang tejangja committee-i agütsü. Ano senden nung Nasha Mukta Bharat Abhiyan, Mokokchung amenoka liasü.

Board-isa, District Hospital lenmang (IMDH), yanglushiba aser NST Bus Station aser ISBT Yimyu-i office belener aoba indang lepa repringshia liasü.

## CTN - Longleng lenmang nung gari tsüktep

**CTN, May 20 (TYO):** May 19 nü Longleng aser Changtongya na tsüngda Lasong yong anasa Longleng leni longsang bener tugur dumper gari ka den gypsy gari ka tsüktepba lendong nung

gypsy nung mena alir nisung ka asü aser gypsy anisangji mejungi yirua lir ta angazüker.

Gypsy ya Longleng len nungi Changtongya leni adokba mapang ka nung iba lendong ya ajuru. Gari ana ya

lenku ka nung tiplen tsüktep aser iba lendong mapang dumper gariji gypsy dak nenlok aser gari nung bena aliba longsangji meküplokba agi tasü tama lendong ya ajuru liasü.

## Apollo Hospitals Guwahati ajanga IMDH Mkg nung angati health camp katsü



Ao Senden ketdangpur den Apollo Hospitals Guwahati nungi arur doctor-tem aser IMDH ketdangsurtem noksa nung angur. Mokokchung, 20th May, 2023

**Mokokchung, 20th May (TYO):** Ao Senden akhüm kübok NE Health Services den yaritepa Apollo Hospitals Guwahati-i "Apollo Day" den repsema angati temang repringba "free health camp" sentong ka yangi Dr. Imkongliba Memorial District Hospital (IMDH), Mokokchung nung kaogo.

Iba camp nung nisung 400 tema tamang angati repringba den mozüa angati lemtü aser

tenüing züluba sen dena magi. Iba den IMDH nung aliba kol (blood test, ultrasound, X-Ray etc) balala amshiba taahjia akhi mapang dang nungi tajemba agia liasü.

Apollo Hospitals Guwahati nungi arur doctor-temji; Dr. Siddhartha Goswami (Medicine, critical care expert), Dr. Shameem Ahmed (Neurosurgery), Dr. Chandra Kr Das (Cardiology), Dr. Javiya

Chetan Dineshbhai (Paediatric) aser Dr. Pankaj Sukla Baidya (Gastroenterology) par pungu liasü.

NE Health Services nungi Akümnaro (Chuchuyimpang) aser pa kinungbu tena teyari ajanga iba health camp katettsüa lenmang lapokteta liasü, anungji par kibong dang kanga pelar, ta Ao Senden ketdangpurtemi iba osangbener den jembidang ashi.

## Advisor Moatoshi-i ayongzüka consultative senden ka menogo

**Dimapur, Monupii/May 20 (TYO):** Advisor for Labour & Employment, Skill Development & Entrepreneurship and Excise, Moatoshi Longkumer-i ayongzüka Industrial Training Institutes Principal tem, state nung Employment Exchanges District Employment ketdangsurtem aser Department of Employment, Skill Development & Entrepreneurship ketdangsurtem den May 18 aser 19 nü consultative senden ka menogo.

Iba senden nung Commissioner & Secretary, Labour & Employment, Skill Development & Entrepreneurship Kumar Patel, IAS-a dena liasü.

Senden nung Moatoshi-i department inyakyim aser takoktem indang lepa repringshiba den state nung unemployment jenjang ajemdaktsütsü asoshi mapa aser inyakyim tasen purapiteta inyaktsü nüngdakba lemsatapa liasü.

Moatoshi-isa, state nung mapa mongui aliba lanurtem employer tem den sendakteptsütsü asoshi job fair tem mapangshia ayongzüka agitsü koda tongtibang iba indang lemsatapa liasü.

Advisor-isa, Department dang Mobile Skill Morung kübok tetsür aser teburtem atema mapa balala anana asoshi District Headquarters ajak nung training sentong kaka ayongzüka agitsü asoshi asameyangtsü ajungshi. Iba inyakyim ajanga skill development atema lenmang sadema lapoktsütsü aser lanurtem mapa balala inyaktsü asoshi maongka agütsütsü, ta ashi.

Kasa mapang nung Additional Secretary & Director, Kovi Meyase-i okila o jembiba mapang Advisor Moatoshi-i department atema süoki ia bilemba atema pelaba lemsatapa den department tejakdangi anir aotsü asoshi jenjang tapet agiba asoshi pa nem tenüngsang agüja liasü.

## DoSE-i class XI admission atema tetuyuba agütsü

**Dimapur, Monupii/May 20 (TYO):** Directorate of School Education-i sangdong ka ajanga, Nagaland kübok Government Higher Secondary School tem nung Class XI atema admission May 25 nungi tenzüksü ta metetdaktsüogo.

Iba dak sendakba nung department-i tetuyuba kar agütsüogo:

1. GHSS tem atema Online Admission Portal ka dang asütsü. Kaketshir/Tsurabur temi department indang website <https://education.nagaland.gov.in> nung agüja aliba link ajanga 'GHSS Admission Portal'-i log in süa school aser parnoki mulungba stream atema application benoktsüla.
2. Kaketshir kati pa/lai mulungba school aser stream atema kwi nung apply süner sütettsü.
3. Iba portal ya kaketshir/tsurapurtemi application tem benoktsü asoshi 25/05/2023 nungi 31/05/2023 tashi lapoktsütsü. Kaketshirtemi HSLC Admit Card aser Mark Sheet copy tem upload asütsü nüngdaker
4. Kaketshir/tsurapurtem shirnok online facility amshiba nung tetsükdaktsü adoker parnoki Department of Information & Technology kübok inyaksangshiba Common Service Centre tem teyari agütettsü. Iba melena kaketshirtemi portal nungi 'Admission Form' download süa Form fill up sür 31/05/2023 nü tashi nung pei school nung benoktetsü.
5. School tem (Offline mode) nung form tem agizükra school temi Online mode ajanga application benokba candidate tem indang list

nung Offline ajanga benokba candidate tem indang osang tejangja külemi benoka inyaksangshitsüla.

6. Kaketshirtem ya pei school-i shimtsü. Kaketshirtem shimtsü asoshi guideline tem Department-i agütsütsü.

7. School shia shimmer aliba kaketshirtem indang list den 'Waiting List' ya 'GHSS Admission Portal' nung 03/06/2023 nung sangdongtsü.

8. Shimer aliba kaketshirtemi Admission Fee ya Portal nung 03/06/2023 nungi 05/06/2023 tashi nung online payment mode ajanga agütsütsü. Online ajanga fee magütsütetertemi temalen shima aliba anogo tsüngda pei school nung agütsütettsü.

9. Waiting List nung aliba kaketshirtem nem menden tazüing ya merit dak ajemdaker 07/06/2023 nungi agütsütsü.

10. Class XI Repeater temi application benoktsü nüngdak madoker. Parnoki Admission Fee pei school nung 30/05/2023 nü tashi nungbo agütsütsüla.

11. Portal nung application benokba tetezü admission angutsü ta masü. Kaketshirtem ya merit dak ajemdaker pei school nung shimtsü.

12. Iba dak sendakba nung osang tejangja ano admission portal ajanga agütsütsü.

Tawa lapokba Government Higher Secondary Schools tem atema admission ya Offline Mode ajanga dang asütsü.

School tem; Arts Stream: GHSS, Tobu/Akuluto/Pughoboto/Tening/Ahthibung/Sungro/Sechu Science Stream: GHSS, Kigwema.



May 20, 2023 nü Hiroshima nung Ato kilonser, Narendra Modi aser South Korea Tir, Yoon Suk Yeol na jurila senden ka amendang tangokba noksa nung angur. G7 senden nung adentsü atema Modi Japan-i oa lir.

### Karnataka nung Congress sorkari election nung nangzükba onük 5 agizükogo

**Bengaluru, May 20 (Agencies):** Karnataka nung Siddaramaiah-i aniba Congress sorkari mezüngbuba Cabinet senden nung assembly election atema nüboyimba mapang nung party-i nangzükba onük pongu mapa kuma inyaksü agizükogo.

Tenangzükba onük pongu rongnung electric light aser ration angati agütsütsü densema lir.

Honibarnü Siddaramaiah-i Chief Minister aser DK Shivakumar-i Deputy Chief Minister tenangzükba agi. Tena den MLA 8-i minister tenangzükba agia liasü.

Tenangzükba agiba sentong nungji Sonia Gandhi bo medentet saka Congress Tir, Mallikarjun Kharge, taoba Tir Rahul Gandhi aser General Secretary Priyanka Gandhi nunger aden.

Kasa sentong nungji Congress-i yimsüsüba state tem nungi Chief Minister tem-Ashok Gehlot (Rajasthan), Bhupesh Baghel (Chhattisgarh) aser Sukhvinder Singh Sukku (Himachal Pradesh) nunger densema lenirtem aika aden.

Tan ita tetenzüklen agiba

Karnataka assembly elections nung Congress party-i BJP sorkar atsüngdoka liasü. Congress-i menden 135 nung takok ngua liasü.

Election mapang nung nangzükba onük pongu mapa kuma inyakba ajanga kum shia senpong nungi sen crore 50,000 shi indoktsü, ta Siddaramaiah-i metetdaksü.

"Karnataka sorkari Honibarnü mezüngbuba Cabinet senden nung party-i nangzükba onük pongu mapa kuma inyaksü atema agizükogo. Onoki nangzükba ama inyaksü," ta pai metetdaksü.

Karnataka budget ji sen 3.1 lakh crore shi lir, ta shia Siddaramaiah-i, "Tenangzükba pongu inyaksü atema kum shia sen crore 50,000 angutsüji tamakoktsü masü. State-i sentsüh metsüi mesüra sensak tia meyoki onoki scheme ponguji mapa kuma inyaktetsü," ta pai ashi.

"Loan agia aliba atema kum shia sen tetemlok crore 56,000 agütsütetdar, anungji kechiba onoki nüburtem atema sen crore 50,000 meindoktetsü," ta pai ashi.

Assembly election mapang nung Congress-i nüburtem dang nangzükba onük ponguji- ita shia kibong shia nem electric light unit 200 angati agütsütsü (Gruha Jyoti), kibong shia tetsüti nem ita shia sen 2,000 teyari agütsütsü (Gruha Lakshmi), ita shia below poverty line (BPL) kibongtem nem züngsem shia jang seret 10 angati agütsütsü (Anna Bhagya), kum ana atema graduate ser mapa mengui alir lanur shia nem ita shia sen 3,000 aser diploma holders shia nem sen 1,500 agütsütsü (YuvaNidhi) aser tetsürtem public transport bus nung angati senzüdaksütsü (Shakti) tenangzükbatem lir.

Yimtenren nung mongintem aikati, assembly election mapang nung Congress party tenangzükbatem ajanga nisung aika, talisa tetsür voters atsüa arutet, ibayongji Congress-i election nung takok angu, ta bilemer.

Election nüboyimba mapang nung Congress lenir Rahul Gandhi-ia lokti senden ajak nung tenangzükba onük ponguji mezüngbuba Cabinet senden nung agizüktsü, ta nangzükba liasü.

### India-i Pakistan nunger angopur 22 tepuokdak nungi chiokogo

**Attari, May 20 (Agencies):** Hokolbarnü India sorkari Pakistan nunger angopurtem parnok 22 jail kümsük abensaba sülen jail nungi chioka Attari-Wagah arrtsü nung Pakistan ketdangsertem ket nung agütsüogo, ta ketdangsertemi metetdaksü.

Border Security Force sepaitemi Joint Check Post (JCP) nung Pakistan nunger angopurtemji Pakistani Rangers ket nung agütsü. Delhi nung aliba Pakistani High Commission-i angopurtem nemji 'Emergency Travel Certificates' agüja liasü, kechiyong parnok tzyüim nung apuba mapang nung parnok ket

nung travel documents maliasü. Angopur 22 rongnungji angopur 9 Gujarat nung aliba Kutch jail nungi anir aru, angopur 10 Amritsar Central Jail nungi aser angopur asem jail balala nungi anir arua liasü. Pakistan nunger angopur ajakji Indian Navy-i apuba liasü.



May 20, 2023 nü Kanteerava Stadium, Bengaluru nung Congress sorkar tenangzükba agiba sentong nung adenertem tangokba noksa nung angur.

## Japan nung PM Modi-i British PM Sunak aser UN tongti Guterres ajuru

**Hiroshima, May 20 (Agencies):** Honibarnü Hiroshima, Japan nung G7 senden aliba mapang Ato kilonser, Narendra Modi-i British Ato kilonser Rishi Sunak, Indonesia Tir Joko Widodo aser UN tongti, Antonio Guterres nunger ajuruogo.

G7 senden nung adentsü atema Hokolbarnü Modi Hiroshima tonga oa liasü.

Modi aser Sunak na ajuruba mapang tenati azütep aser Sunak-i twitter ajanga Modi den azütepba noksa ka lemsatapa liasü.

Senden amenba sülen Modi-i twitter ajanga, "Tir @jokowi aser Widodo na ajuruogo. India-i Indonesia den tesendaktep tashitait asütsü atema tongti süa

inyaker," ta metetdaksü. "Hiroshima nung @UN Secretary-General @antonioGuterres den jangratema sensaksemogo," ta Ato kilonser Modi-i twitter ajanga metetdaksü.

Iba jakdang Modi-i Japan Ato kilonser Fumio Kishida, South Korea Tir Yoon Suk Yeol, Vietnam Ato kilonser Pham Minh Chinh aser German Chancellor Olaf Scholz nungera ajurua liasü.

G7 linüktem- US, France, UK, Italy, Germany, Canada aser Japan linüktem ya alima nung takartiba democracy linüktem lir.

Tang G7 Tirji Japan lir, ibayongji Japan tongti leniri iba senden nung adentsü atema India densema linük ti jaoka liasü.

## Tanabuba Demonetisation ya aibelen miimbangtsü atema asü?: Kharge

**New Delhi, Monupii/May 20 (Agencies):** RBI-i sen 2,000 note agienba sülen Honibarnü Opposition lenir aikati sorkar aitsüogo.

Congress Tir, Mallikarjun Kharge-ia, "Tanabuba demonetisation ya tamalen telemtetba tai agiba miimbangtsü atema asü?" ta asüngdang.

Kharge-isa demonetisation benokba anema bushisüngdangtsü takhangba agütsü.

Hokolbarnü Reserve Bank of India (RBI)-i 2,000 note agienba metetdaksü saka September 30 tashi nung sen 2000 note bank nung deposit asütsü mesüra melentsü mapang agütsüogo.

Hindi oshi agi twitter ajanga Kharge-i, "Mezüngbuba demonetisation ajanga nai linük rongsenketzung nung tarak tulu kettsüogo. Iba ya ajanga unorganised sector ajak raksatsü, MSMEs shibangadok aser mapa crore aika sama," ta metetdaksü.

"Tang sen 2000 notes 'tanabuba demonetisation'... Iba ya mezüng telemtetba tai agiba miimbangtsü atema asü?"

Bushisüngdangba ajanga iba onük nung ochi jungkai adoktsü," ta Congress National Tirisa metetdaksü.

Trinamool Congress MP, Mahua Moitra-i, "Terenlok linük shingaia nüburtem maneni timtemi yoka sen notes agi metsümeshidak amshiba paper mekümdaksür. Kechiba kum ishika shia asenok timtemdaksütsü?" ta aitsü.

Sen note 2000 agienba dak sendakba nung AIMIM tongti lenir, Asaduddin Owaisi-ia Modi dang tasüngdangba pongu asüngdang.

Owasi-i, "Top Economist PM Modi:@PMOIndia dang tasüngdangba pongu. 1. Kechiba mezüng yongi nai sen note 2000 amshitsü lemtet? 2. Tang tamshidak sen 500 note ya-a kobi melii agentsü asü? India nunger crore 3.70 ket nung smart phone mali, anungji parnoki digital payment koma amshitsü? 4. Nai Demo 1.0 aser 2.0 benokba nung Bill Gates meyong Better Than Cash Alliance ajanga kechi shilem agia lir? 5. NPCI ya China nunger hackers-i hack asür asü? Yamaji süra rara mapang nung payments koma asütsü?" ta asüngdang.

**SBI** State Bank of India  
STRESSED ASSETS RECOVERY BRANCH, JORHAT

Na-Ali, M G Road, Jorhat, Opp. ASEB Building, PIN-785001 (Assam)  
Tel No : 0376-2300193 / 2300204

[Rule - 8 (1)]  
KIOJEN AGIADOKBA NOTICE

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules 2002 Rule 3 kubok section 13(12) nung agüja aliba tashi nung ajemdaker tsünglanglen sign sua alir State Bank of India nung Authorised Officer-i 07.06.2019 anogo nung Demand Notice ka ajanga sen apur/guarantor Mr. Victor Chophy, Proprietor of **M/s. ABI Bricks Industries aser guarantors Smt. Riche Sema aser Smt. Alisha Rengma** nunger dang notice agütsüba anogo nungi tenzuka anogo 60 tsüngda notice nung shia aliba ama **Rs.24,46,003.59** (Rupees Twenty Four Lakhs Forty Six Thousand and Three and Fifty Nine Paise only) agüjang ta metetdakja liasü.

Ajisüaka sen apurtem/guarantors-i senji magütsütet, anungji sen apurtem/Guarantor aser public dang, tsünglanglen sign sua aliri iba Act nung Section 13(4) kubok Rule 8 nung agüja aliba tashi amshia **2023 kum May 18 anogo** nung tsünglanglen shia aliba kiojen agiadokogo ta sangdonger. Talisa sen apurtem/Guarantor aser public dang iba kiojen dak sendakba inyangshishi kecha masütsü metetdaksür, kechiyong ibaji Rs.24,46,003.59 aser 08.06.2019 anogo nungi sen telemok atema State Bank of India meyong lir ta metetdaksür.

**Iba Act nung section 13 kubok sub-section (8) nung ajemdaker sen apur dang mapang shidak nung item kiojen alanzüktsü metetdaksür.**

Kiojen osang tejanga:

Dimapur, Nagaland nung Shri N Victor Chophy tenung nung aliba Patta No.1925, Dag No.628/2205, Block No.4, Mouza No.2 nung ali tasazük 1 Katha 3 Lecha (308 Sq Mtr) nung aliba ajak aser Assam type building.

Bounded:

**North tsütsülen** Smt. Riche Sema kimong, **South tsütsülen** Pitoli kimong,  
**East tsütsülen** Main Road, **West tsütsülen** Smt. Riche Sema kimong.  
Date : 18.05.2023 **Sd/- AUTHORISED OFFICER**  
Place : Dimapur (STATE BANK OF INDIA, SARB Jorhat Branch)



## TIR YIMYIM YIMOBILEM (EDITORIAL)

DIMAPUR AMUNGNÜ, MONUPII (MAY) 21, 2023

### Tsüngrem yimli

**K**otakji Tsüngrem yimli, anungji yangji Tsüngremi mulungba dang inyaker. Aji oda, Tsüngremi kechi ashir aser kechi inyaksü tenyadir kotak tenyartemi kecha nungnanga melii inyaker. Ibaji mesüka tanü asenok aliba lima nunga asenok kibong aser mapa inyadkaj jak nung Tsüngrem mulung südakjang ta Yisui ashir. Tsüngremji anüng aser ali madak kibur, Pai asenok yanglu ta asenoki amanger, saka asenoki Pai mulungba nung meliner. Aji oda, kiburi ashi mangaba kilirtemji asenok lir. Ibayongji, asenok mulungjang nung tepela malir kechiyong asenok taküm aser kibongji Tsüngrem yimli nung masü moiijing yimli nung alir. Iba amaji jashia malitsü asoshi Yisui asenok dang Mathi tapu 6 nung, "Nü yimli arung, Kotak nung kechi koma lir, yamaji alima nunga nü mulung sang," ta Tsüngrem dang mepishia sarasademdaksüner. Alemli Yisu Khrista alimai marudang Yihuda nungertemi Tsüngrem yimlij alima nung bendanger yimten yimsüsüba ajak makdoker, Jehovah Tsüngremi parnok nem yimten tashi agütsür, alima ajak ramoka Israel nungertemi yimsü asütsü ta bilema liasü. Ibayongji, kenü anogo Yisu nütsüngtemia Pa dang Israel nem kodang yimli meyipa agütsütsü ta asüngdangba Laishiba nung angur. Ajisüaka, Tsüngrem yimlij alima yimli amato masü, alima yimlibo rara asee meputep adokdaksür saka Tsüngremi yimli nungbo teti tepela aser tesünep lir. Ibayongji, anogo shia asenoki Tsüngrem dang kü mulungjani, ozü kibongi, ozü telok dangi, ozü yimtaki mesüra onok alidaki "nü yimli arung," ta sarasademtsü Yisui sayu. Tetezü, kü taküm mesüra onok rongnung kotak nung ama nai mulungba dang inyadkajjang ta Tsüngrem dang mepishitsübaji tongtibanga ta asenok nem angatetdaksür. Tanüa asenok aikati Tsüngrem yimlij asenoki manguba tasür tanülatem alidak kotak limaji danga ta bilemer. Ajisüaka, Tsüngrem yimlij asenoki manguba kotak limaji dangbo masü saka tanü asenok alidak lima aser asenok kibongtem ya lir. Anungji, idaki Tsüngremi mulungba inyaka alitsü tim. Aji oda, kodang asenoki asen taküm, kibong aser lokti ya Tsüngrem yimlia ta angatetter, idangji asenoki Tsüngremi mulungbaji kechi ta angateta inyaksü merangtsü. Yimten nunga kodang yimsüsürtemi parnoka Tsüngrem yimli nung tenzüker ta angateta yimsü südir, pei mulungba agi masü saka Tsüngrem mulungba nung yimsü asütsü. Iba kasaji arogo nung tenzükertermia kodang arogoji Tsüngrem yimlia ta angateta tenzükdir, tali tejangraba aser tajungba tenzüktettsü. Iba kasaji nisung shiai pei inyakba mapaji Tsüngrem yimli nung inyaker ta kodang angateta tenzükdir, ochimashi inyaksüba shisatsüji anasaia marutsü. Aji oda, kodang asenoki Tsüngremi mulungba inyaknüa Pa dang asüngdangdir, Pai asenok dang lenmang sayutsü. Idangjibo asenok Tsüngrem den külemi Pa yimli nung Pai mulungba mapa inyaker tongti kaka akümstsü. Koba mapa südir süang, alima nung Tsüngremi mulungba mapa inyaka alitsübajisa jangratemtsü taketba asütsü. Aji oda, Tsüngremi mulungba inyaksübaji yimten nung asütsüa akok, lokti nung asütsüa akok, arogo nung asütsüa akok mesüra pei taküm aser kibong business nung asütsüa akok. Atangji, asen taküm nung Tsüngremi mulungba mapa angatettsü aser reprangtettsübaji tasak, ibayongji Yisui asenok dang sarasadema Tsüngrem dang asüngdangtsü ajungshir. Sarasadema ajanga Tsüngremi asenok nem Pai mulungba mapa inyaksü asoshi renemtsütsü. Aji oda, asen taküm nung Tsüngremi mulungba dang inyadkajjang ta anogo shia asenoki sarasademtsübaji kanga tongtibang lir. Asen aliba lima ya Tsüngrem yimli küma alitsübaji asen taküm aser kibong nungi tenzüksüla. Idangji dang, ano asen aliba lima nung Tsüngrem yimli ulushia kümyonga aotsüba mapa nung Tsüngremi asenok amshitsü. Asenoki aiben Tsüngremi mulungba ama masü saka aseni mulungba nung inyaksü asoshi yimten aser lokti nung shilem agir, kechiyong alima nung arogo dak alaka yimten aser lokti tentetjibo Tsüngrem yimli masü amai bilemer. Ajisüaka, asenoki yimten aser lokti nungbo 'nü yimli taru, onoki mulungba dang inyakdi,' ta ashitsü makok. Iba amaji bilema inyakerterm aika laoogo aser ano laotsü, anungji asenokibo asen yimten aser lokti nung dena Tsüngrem yimli jaokdi.

## OLEMSABANG

### OSANG KAKET YA TONGTIPANG

- S.Nüken Longkumer, Naga United

All India Radio ajanga ashi ama centre nungi yokba sen ya aluyimer aser sensakertem yaritsü asoshi aruba rongsen lir shidak amshitsüla. Linertemi shidak mamshiba ajanga Naga lima sensak tia tali akümer. Naga nunger tangar yimya chilu tera angazüker Kohima Dimapur amala nung cari tasentem amshitepba maparen jagi kodanga majungtsü tepelemtsü tulu bener arutsütsü nükla nuing sayur. Küsa nNaga nungertem 80% anogo shi sen Rs. 50 mangur aika lir, nibo ajuruogo. Takartem nenokibo mangutsü, majurutsu saka lirgo. Oh tulerterm nenoki kodanga mangatetsü, kechiaser nenok peria bendena doker. Onok sensaker amang tepeyong pei yepden nung ajepba mangashir no? jang (rice) sen Rs. 28 agi alitsü makokba anogotem ajuruogo, ayangdak kecha maka, inyaknürsür nung mapa mangur. Nenok sensak taji Tsüngremi yanglu ta belema yutsür alima rangben nung sensaker zunger mezungma lir. Tsüngremer sendong palala renem, saka asen Naga lima nung chimartem mapa aika inyakba angur. Naga lanurtemi memetetba mapa asütsü, yamai dang aonungbo asüngbo asen chirtem timtem tulu. Chimar aser tuler chirnurtemi asenok sendoker, Naga nunger ya azümesener ta aikati jembir, belemer. Chirmartem ya bendangertem lir, sobaliba yimya palala iba yongji aseni Naga sobalibaren bushiteper. Tanü atema tembar tajung bendanger chimartem kechi südir süaka nabo litettsüsa, saka tarütsu nükla majung lir. Yamaji tanü Naga lima tuler aika pa maparen aliba mapang chuba menden nung alidang pei nuburtem shinga merepang tesülen yutsü tangbo mapangtem süitema arudang pei sasa belemtetba aika angutsü. Yamaji dang pa taküm tempangtsü koda tesasatsüka iba sülen semchirtem tajung madok, shingai mungui dang temeim mapa inyaketba sungjang tajung atangba kipong ajuru dang süngmanga liasü. Na O ajungba dak alaka nai shinga repranga maru, temeim tenla kecha maliasü, nai nü tesüiba mapang tajung ajuru dang kechi inyak? Anungji alima nung shisatsü talangtibaji temeim mapa ya lir, shisatsü takütibaji tenükmerem ya liasü. Nü datk tenükmerem aliba ajanga tangar meyaritet tenükmeremi alima raksadaktsür, mapa tajung ajak tzüyim telungi yoker. Oh Kü Nokinketer wapong tajung aika moatsüba lima Nagaland. Sungku O yim waluniba mali nungbo arem ozütem tanishir malitsü aser samatsü Nagaland. Yamaji Naga lima lungma nung dang süaka hon dang nungi taoba kütsü lima koda tepur tajung yangji ni aso. Oh Naga lanurtem shibai pei lima yanglutsü pei taküm tenla agütsüa asen lima Nagaland yanglutsü. Cari lemangbo tera tera yanglua aotsü merangtepedar F/H road yabo Naga nunger ajak rongsen tulutiba, tanü Nagalima nungtugo asem samar ratateper Paper mill – Sugar mill – Cement Factory den Industry karbo sama ogo ni. Lanurtem züngteter mapa manguba tia nung aika jashiseta lir, koda asütsü? Ano temerük Election ya ajungtsü na? ozü sensakeri temerük Election ya kechi tang ajar mangateter? Jung junga rasa-a shiang?

Ano tarutsü nung külemi lemsatepdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Samaritan's Purse-i Mississippi nung yipru agi kongshiba kibongtem yarir



May 19, 2023 nü Mississippi nung mobile ki ka jakdang Samaritan's Purse CEO aser Tir, Franklin Graham-i (ajichi) teyari angur ka den salemdang tangokba noksa nung angur.

**May 20, 2023:** Christian aid organization- Samaritan's Purse-i Hokolbar (May 19) nungi tenzüka Mississippi nung yipru agi kongshiba kibongtem nem mobile ki lema agütsü tenzüko.

Taküm March 24 nü yipru mopung tesashi ajanga mile 100 tashi nung asüba kiojen aika raksaja liasü aser nisung 26 asü.

May 19 nü Amory, Mississippi nung teyari agütsü tenzüka sentong nung jembidang Samaritan's Purse CEO aser Tir, Franklin Graham-i iba yipru agi kongshiba kibongtem atema sarasademja liasü.

Yipru ajanga takoksa angurtem den jembidang pai, "Tsüngremi nenok meimer, ta ni nenok nem metetdaksüner. Teimla mesamatsüla. Pai nenok mesendok, anungji Yisu Khrista dak imlaang aser tamang

kaang," ta ashi.

Samaritan's Purse teloki Amory, Rolling Fork aser Silver City jilatem nung ki kanga mejungi raksaba mesüra ki insurance maliba kibong 35 nem mobile ki lema agütsü.

"Item kiji mobile homes dang nungi tajungba aser anaben agi tashi taitba. Item ki ajanga ghonda ka nung kilometer 110 tashi kera aonba yipru mopung tizüktetsü. Onoki iba ya Yisu Khrita tenüng nung inyaker, kechiyong iba mapa inyaksü atema Tsüngremi onok jatet," ta Franklin Graham-i ashi.

Item kilem aser atemji kanga tashitait, tempered glass inoka lir, jara temelen aser yipru tizüktetsüsa oset aika lir.

Teyari angur rongnung ka, Josh Hatcher'er ki khen mi agi rongdoka liasü aser March ita nunga yipru ajanga par ki raksa. "Timtemba mapang nung

Tsüngremi onok yarir. Iba ki tasen angutsüsa Tsüngremi lenmang lapoktsüogo. Tsüngremi onok atema aika inyaksür," ta pai ashi.

Yipru agi tamajungtiba kongshiba jila anaji Rolling Fork aser Silver City na liasü.

Taküm March 25, 2023 nü iba yipru lendong atalokba sülen ghonda 24 tsüngda Samaritan's Purse-i teyari agütsü tenzüka liasü.

May 19 tashi nung Samaritan's Purse nungi volunteers 1,145-i ki 400 dak tema yanglushiba nung yaritepa aruogo.

Samaritan's Purse-isa Tennessee aser Arkansas nunga teyari mapa inyaka liasü. Yipru ajanga Mississippi kongshiba sülen hopta ka shi dang lir Tennessee aser Arkansas nunga yipru lendong ataloka liasü.

## ANO GO ABEN TSÜNGREM DEN

## KODASÜR NI PA ANEMTSÜ?

*Nai tasü tonga aremang, aser ni ne nem taküm korangji agütsüsü.*

~ Jungkai Adok 2:10

Polycarp, Smyrna nung aliba arogo lenir apu. Smyrna ya tanü-asüng Turkey lima nung yimti ka lir. Akhidang iba ya Rom yimsüsüba kübok liasü. Rom sepaitemi Polycarpji Tsüngrem metetba nisung tambur ka ta meteta liasü. Pa dang Khrista menangzüksü aser pa taküm mesüi kümzüka alitsü indang sepaitemi ashi. "Ne tamangji tokjang aser Caesar külemang, ajita mesüra shiruru nem ni na agütsüsü ta Rom ketdangpur kati ashi. Tambusangi aji magizük. Loktii pa ngusetdaksütsü asoshi molusongzü chiokang ta noktak, saka ketdangpur tongtibi ashi, iba anogo asoshi mapangji temogo. Saka ano lokti jagi tambusangji mi nung rongang ta ayimten. Idangji tambusang jagi ashi, "Küm tir aser trok ni Pa tenzüko, aser Pai ni kodanga meyrudaksü. Süra kudasür ni kü Chuba aser kü Kümzüksang anemtsü?" Iba anogoji pa mi nung rongset. Küm merijang ana shi süiogo, pai Khrista dak amanga Khrista tenzüka kuli jagi maneni asenok mulung nunga tsünga jembir.

Asenoki Yisu dak amanga Pa tenzüka arur. Pai kodanga asenok meyrudaksü, Pai tamakok anguba kecha mali, Pai aibelena inyakba maka, Pai kodanga mejashidaksü. Kechiba Pa mamangtsü? Taküm nung kechi ajurudir ajuruaka, Yisu dak amangba mechioki Pa maneni tenzüki.

## SARASADEM:

Kibuba Yisu! Ne den teti ni jajatsi, tasütait nela tamang takang kü nem agüjangma. Amen.

## Evangelical pastor aser sayutsüngir Tim Keller alima nungi pilaogo



Pastor Tim Keller aser pa kinüngtsü Kathy Keller na noksa nung angur.

**May 20, 2023:** New York City nung evangelical pastor, sayutsüngir, Laishir aser kaketzülur, Timothy Keller mapang talangka pancreatic cancer agi shiranga aruba sülen May 19 anepdang alima nungi pilaogo; pa arrshi küm 72 liasü.

Manhattan nung aliba Redeemer Presbyterian Arogoi sangdong ka ajanga, Tim Keller Hokolbarnep alima nungi pilaogo, ta metetdaksü.

Redeemer Presbyterian Arogo ya Tim Keller aser pa kinüngtsü nati tentetba Arogo lir.

Arogoi sangdong ka ajanga, "Redeemer Presbyterian Arogo tentetsang aser mapang talangka senior pastor inyaksang, Tim Keller tanep arrshi küm 72 lia alima nungi pilaogo, ta tejashi nung sangdonger. Pa lenisüba atema onoki teti pa dang pelatsü aser Khrista temeim tangar den lemsateptsü. Pa yangi meliaka pa kodak nung pa Kümzüksang den külemi pelatepdar ta asenoki metet," ta metetdaksü.

"Tim-i pai inyakba mapa meima liasü. Pai Redeemer

Arogo züngsemtem den jembitsü aser alima nung ministry lenirtem den shisalemsateptsü jangra. Taochi osangtajung nung tashi tulu aliba lemsateptsü pai jangra," ta Arogoi metetdaksü.

Taruba hoptatem nung pa nüngtem nung New York City nung sentong ka agitsü, iba sülen memorial sentong ka agitsü. Sentong anapronglaji 'live stream' asütsü.

"Onoki pa kinüngtsü aser Redeemer Arogo yarisema tenteter, Kathy aser par kibong atema maneni sarasademjang ta mepishir," ta Arogoisa metetdaksü.

Par jabaso, Michael Keller-i Facebook post ka ajanga, "Kinüngbu ka, tebu ka, tesayur, medemer, pastor aser shisashir Timothy J. Keller tanep kidang süogo. Kübui kütsü dena kija mapang agitsü ata-a liasü. Lai pa tenütsü nung tebang mesep, iba sülen pa amouzüka ao. Pai tatemsabuba jembiba o kar ajanga onok melung süngzükur," ta metetdaksü.

Tim Keller ya 1950 küm

Allentown, Pennsylvania nung aso. Pai Bucknell University nungi bachelor of arts degree angu, Gordon-Conwell Theological Seminary nung master in divinity renem aser Westminster Theological Seminary nung doctor in ministry angu.

Pa Hopewell, Virginia nung aliba West Hopewell Presbyterian Arogo nunga pastor inyak, Westminister nung associate professor inyak aser America nung Mercy Ministries for Presbyterian Church nung Director inyaka liasü.

1989 küm pai New York City nung Redeemer Presbyterian Arogo tenzüka liasü aser Redeemer City to City organization nungi chairman inyak. Iba organization yagi New York densema yimti balala nung Arogo tasen tenzüka nung yarir.

Keller-i kaket aika zülüogo aser item rongnung 2008 küm adokba kanga nüngtugu kaket 'The Reason for God' densema lir. Iba kaket nungji 'kechiba

Tsüngremi meimchir timtemtsü melar aser mekümzükbapurtem molumi-i yoker? tasüngdangba densema tasingdangba balala atema telangzüba agüja lir.

Keller-i züluba kaketem rongnung- The Freedom of Self Forgetfulness, The Meaning of Marriage, The Prodigal God, The Songs of Jesus aser The Prodigal Prophet densema lir.

2020 küm May ita nung Keller dak stage 4 pancreatic cancer puteta sülen Bethesda, Maryland nung aliba National Institutes for Health nung chemotherapy agiba den külemi immunotherapy drug tendanga liasü.

Pa dak cancer tashidak putetba sülen küm ana ajungba mapang nung Keller-i Twitter ajanga, chemotherapy agiba ajanga cancer ajema kümdar, ta metetdakja liasü, ajisüaka taküm March ita nungbo pai, pa temang nung cancer tumors tasen adokogo, ibaji ajanga pa maneni treatment agitsü atema National Cancer Institute-i aoer, ta metetdakja liasü.



## Ukraine nem F-16 fighter jets agütsüba ya lendong asütsü

**Moscow, Monupii/May 20 (Agencies):** Anüolen aliba linüktemi Ukraine nem F-16 fighter jets agütsüba ya lendong tulu asütsü, ta Russia nung ketdangsur kati ashi.

Ukraine nem jet fighter agütsüba asoshi asatepba indang Honibarnü osangbenertemi asungdangba mapang Russian Deputy Foreign Minister Alexander Grushko-i iba telangzüba agüja liasü.

Ukraine-i mapang talang ka nungi NATO linüktem dang parnok nem fighter jet agütsüba asoshi mepeshia aruogo, ta TASS news agency sangdong ka ajanga

metetdaksü. Tang tashi nungbo Ukraine nem tayimtsütem agütsüba ta nangzüka mali, ajisüaka US tir Joe Biden-i Hokolbarnü G7 lenirtem dang F-16 dak sendakba nung Ukraine nung pilot tem nem training agütsüba asoshi longjemer inyaktepba ya Washington-ia pu asemer ta shiogo, ta United States ketdangsur tejen kati metetdaksü.

"Anüolen aliba linüktemi rara tamajungba kümdaksütsü meranger ama reprangteter. Iba ya parnok asoshia lendong tulu asütsü," ta Grushko-i ashi.

"Iba ya onok sentong nung bendenloksü aser onoki ayuba

nükjiong ataloktsü asoshi onok dak tashi lir," ta paisa ashi.

Ukraine tir Volodymyr Zelenskyy-i ita aika Russia-i Ukraine amakba nokdangtsü atema parnok nem fighter jets agütsüba asoshi mepeshia aruogo.

Ajisüaka Ukraine nung lenir-i mepeshiba ya mapang talangka magizüki aruogo, kechiyong parnok nem teyari agütsüba anüolen aliba linüktemi Ukraine nem advance hadirtem agütsüba Russia tir Vladimir Putin-i jenjang tesashiba agütsü aser rara ya Europe ajunga nung prokshia aotsü ta tsüba bilema liasü.

## SÜR KÜM KA AJUNGBA



Late I. Sashi Jamir  
Asüba anogo 21/05/2022

Onoki teti dang meima aliba aser kodanga amatoktsü makokba kinungbo, oba, oboula, nai onok toktsür or tanü küm ka abensa dang taliang menungrar aser rongjenseta bilemer. Ne menurem jak, ne temeim olatem, ne temeim mapa kodanga amatoktsü makok onok mulungjang nung iba ya teti nuklai arur. Na onok mulungjang nung teti lir. Tanüa kasa onoki na menungraseta sarasadema amonger. Kenü anogo asenok ajak Kibuba tsungdang ajuruteptsü yongyaseta atar.

- Teti meima aliba, Kinungtsü, Chirnur, Semchirtem, Anükapang

### GOVERNMENT OF NAGALAND SCHOOL EDUCATION DEPARTMENT

No.DSE/HSS/14-2/2022

Kohima, dated the 19th May, 2023

#### ADVERTISEMENT

Pursuant to the approval of the Cabinet vide No.CAB-2/2013 Dated 20-09-2022 and clearance of the NPSC vide U.O.No.417 dated 10-08-2022, applications are hereby invited from interested eligible indigenous inhabitants of Nagaland for engagement as Post Graduate Teachers under the Department of School Education for the post already advertised by NPSC, in NPSC-2/CESE/2022 vide No.NPSC/ADVT/EDS-2012 Dated 29-09-2022 as per the details given below.

Sl.No	Subject	No.of Posts	Educational Qualifications
1	PGT Mathematics	12	1) Post Graduate with at least 50% marks (or an equivalent) relaxable by 5% for Scheduled Tribe / Scheduled Caste/differently abled candidates, at the Master's degree level in the relevant subject from a recognized university  2) B.Ed from any NCTE recognized institution.
2	PGT Physics	8	
3	PGT Chemistry	8	
4	PGT Botany	8	
5	PGT Zoology	8	
6	PGT Geography	6	
7	PGT English	21	
8	PGT History	8	
9	PGT Political Science	8	
10	PGT Education	8	
11	PGT Sociology	4	
12	PGT Philosophy	4	
13	PGT Economics	4	
<b>Total</b>		<b>107</b>	

The engagement is strictly on contractual basis with remuneration of Rs 35,000/- (Thirty Five Thousand) only per month for a period of 1 (One) year or till the posts are filled up on regular basis through NPSC, whichever is earlier.

Interested candidates may submit their application along with their resume and all necessary documents to the Section Officers under the Department of School Education, Nagaland Civil Secretariat, Kohima on or before 30-05-2023.

The walk-in interview will be tentatively held in the Second week of June, 2023.

Sd/-

Commissioner & Secretary to the Govt. of Nagaland

### GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA

NO. ED/AEI-3/2023

KOHIMA, THE 19TH MAY 2023

#### NOTIFICATION

In pursuance to Government Notification No. DSE/Cab/HSE-UPGR/2012-13/1154 dated 17/05/2023, it is hereby notified for the information of all the concerned that Admissions to Class XI in the following Government Higher Secondary Schools will commence with effect from the Academic Year 2023-24.

##### Arts Stream:

- Government Higher Secondary School Tobu, Mon
- Government Higher Secondary School Akuluto, Zunheboto
- Government Higher Secondary School Pughoboto, Zunheboto
- Government Higher Secondary School Tening, Peren
- Government Higher Secondary School Ahthibung, Peren
- Government Higher Secondary School Sungro, Wokha
- Government Higher Secondary School Sechu, Zubza

##### 1. Government Higher Secondary School Kigwema, Kohima

Students desirous to take admission in the above mentioned schools may contact the concerned Head of Institutions during the period 25- 31 May, 2023 along with copies of HSLC Admit Card and Mark sheet.

Further, Science Stream has been introduced in the following Government Higher Secondary Schools with effect from the academic year 2023-24.

- Government Higher Secondary School Chumukedima, Chumukedima
- Government Higher Secondary School Pfutsero, Phek

Students desirous to take admission in the Science Stream at the above schools may refer to this Office Notification No. ED/AEI-3/2023/108 dated 19/05/2023 for further details.

(THAVASELAN K) IAS  
Principal Director.

## KONANG NÜNGSANG AGÜTSÜR



**Kongro Molongnenla** D/o Wb. Imlinukshi aser Wt. Imsünungla, lai National Institute of Technology, Nagaland, Chümoukedima nungi Physics nung Doctor of Philosophy (Ph.D) ngutetba atema onoki kanga pelaba den konang nüngsang agütsür.

Tsüngremi la taküm aser wadang ano maneni moajangma.

- Lt. Jongpong mangyang (Ex.Pastor) aser Mrs. Sakurepla, Changtongya Yimsen, Chirnur, Semchisemnur aser Anükapang.

### RUBBER FARM TAYOKTSÜ LIR

Tuli (Paper Mill) 10<sup>th</sup> mile, main road nungi furlong ka shi pilar rubber dong 500 shi tang teyimdak tayoktsü lir. Alitsü ki (RCC), smoke house, rubber machine aser osettsüset ajak lir.

Contact: 9436828848/8118949875

## Pak court kati Khan pusemer 120 dak tema chioktsü tuyu

**Lahore, Monupii/May 23 (Agencies):** Pakistan nung court kati Honibarnü Imran Khan pusemer 120 dak tema chioktsü tetuyuba agütsüogo, shirnok May 9 nü taoba PM apuba sülen Punjab province nung mangatetep tulu adokba mapang pua liasü.

Lahore High Court (LHC)-i sorkar dang Khan-i aniba Pakistan Tehreek-e-Insaf (PTI) party kübok inyaker 123 memonoi chioktsü asoshi tetuyuba agütsüogo.

PTI lenir Farrukh Habib-i party kübok inyaker chioktsü atema mepeshia ken o benokba angadanga sülen iba tetuyuba ya LHC nungi Justice Anwarul Haq-i agüja liasü, ta Dawn osang kaket sangdong ka ajanga metetdaksü.

Faisalabad nung apurtem ya tang Punjab kübok tepuokdak balala nung sota yua lir.

May 9 nü ochi mashi ken o dak sendakba nung Islamabad High Court (IHC) nung paramilitary Pakistan Rangers temi Khan apuba sülen Pakistan ajunga mesüngjemeti aküm. Pakistan indang puti otsü nung tang mezüngbuba longkak aitertemi Rawalpindi nung army headquarters (GHQ) amak aser Lahore nung Corps Commander indang ki (Jinnah House) nung mi senokja rongdaksü.

Mepetmesü aokba sülen nisung 10 süogo ta police temi metetdaksü, ajisüaka Khan-i aniba party-i ashiba agi, security personnel temi injang

khaloktsüba sülen party kübok inyaker nisung 40 tashi süogo.

Hombarnü military lenirtemi civil aser military installations amakertem pua, Pakistan Army Act aser Official Secrets Act densema linük temzüng ozüng kübok tapet temerenshi agütsüba ta tenangzüka agütsüogo.

Law enforcement agencies temi Pakistan kübok tesem balala nung PTI pusemer 7,000 dak tema puogo aser parnok rongnung Punjab nungi 4,000 densema lir.

Punjab caretaker Chief Minister Mohsin Naqvi-i ashiba agi, tetsür 500 dak tema police temi bushidar aser May 9 nü dak sendakba ken o 138 shi benoka lir.

Naqvi-i, tebur sepaitem dang tetsürtem maputsü atema tetuyuba agütsüogo ta ashiba den army installation balala raksatsürtem kechi südir süaka aputsü nungdaker ta ashi.

Human Rights Watch (HRW)-i sorkar dang, nisung 4000 dak tema obendangba mapang meimchir temeden benoka inyaksangshitsü mepeshia metetdaksüogo.

Honibarnü HRW associate Asia director Patricia Gossman-i, "Pakistan sorkari political opposition activist aser yimjung nung longkak aitertem apuba anentsü nungdaker.

"Longkak aitertem senshidaksütsü atema tanga lenmang kecha mali nungdang firearms amshitsü nungdaker," ta HRW-i ashi.

## Archery World Cup: Ojas, Jyothi & Jawkar nungeri gold medal angu



Jyothi Surekha Vennam & Ojas Pravin Deotale nati gold takok ngur pelaba noksa nung angur

**Monupii/May 20, 2023** (Agencies): India compound mixed team nung Ojas Deotale aser Jyothi Surekha Vennam nati maneni kanga junga asaya Honibarnü Korea nung tarap koka World Cup gold medal atonga nguogo.

Taoba ita Antalya nung World Cup Stage 1 nung gold medal anguba sülen tenati maneni kanga junga asaya Korea nung top-seeded team 156-155 agi koka liasü.

India nung asayar anaprongla aser Korea nung asayar Kim Jongho aser Oh Yoohyun nung ajaki mezüngbuba asaya asem nung point 40 agutsü aliba nungi 39 nguteta liasü.

Tatembangbuba asaya nung Korea nung tarap yagi junga mekhatet aser kasa mapang nung Deotale aser Jyothi nati maneni kanga junga asaya point 39 angu aser World Cup gold medal anabuba atonga ngua liasü.

Kija asaya nung kanga kara

tsükatokba sülen final nung Jyothi-i kanga junga asaya tenzüik, ajisüaka la indang arishi küm 20 tain partner yagi perfect 10 kata monguteti asaya liasü.

Ajisüaka Jyothi-i khen anaben ka 10 nung mekashiba mapang Ojas-i kanga junga kashia liasü aser tena kati ka nongitpepa temaba jenjang nung kanga junga asaya liasü.

Final end-i aiba mapang team anapronglai point 117-117 ngur liasü aser Jyothi-i tatembangbuba akhaba mapang 10 nung kashi aser takoker bendangtsü atema Oh Yoohyun-i tatembangbuba akhaba lasangjang ya asadangtsüsa aküm.

"World Cup tepeyong küna kanga junga sensaktepa asaya aser kanga junga khatetogo. Final nunga küna kanga rangloker asaya liasü," ta Jyothi-i ashi.

Jyothi-i 2023 World Cup season kanga junga tenzüikogo aser lai tang tashi nung gold

medal asem ngua lir, kong Antalya leg nung lai gold medal ka anguba densema lir.

Vijayawada nungi asayar ya ita ana sülen Berlin nung World Archery Championships nunga takok tajung angutsü atema imla atadar.

"Onok atema World Championships ya ajak dang tongtibangtiba asayamung lir, aser gold medal anguba ajanga onok asayaba yimya dak tali temulung lemteta kümdaktsür. Onoki maneni junga asayayonga aotsü imla atar," ta lai shisem.

Kasa asayamung nung India nung archer Prathamesh Jawkar-i Honibarnü tebur kija compound asaya nung Netherlands nung number one asayar Mike Schloesser koka gold medal nguogo.

Prathamesh shibai Korea nung Kim Jongho aser Choi Yonghee na koka liasü pai final asaya nung world No. 1 asayar ya 149-148 agi koka liasü.

## Pakistan Hockey Coach Siegfried Aikman-i mapa toktsüogo



**Monupii/May 20, 2023** (Agencies): Taoba ita 12 tashi itasen manguba sülen Pakistan indang Dutch hockey coach, Siegfried Aikman-i mapa toktsüogo.

Aikman shiba national team nung taoba küm dena liasü, pai social media ajanga pai head coach mapa toktsüba osang lemsatepa liasü.

Itasen dak sendakba nung mangatetep adokba ajanga Aikman taoba küm Pakistan

nungi kidangi meyipaogo, ajisüaka pa indang arrears angutsü ata-a mapa metoktsü liasü. Ajisüaka ken o bentettsü timla makai akümba sülen pai pa mapa toktsüogo.

Aikman-i Pakistan Hockey Federation (PHF) nem pa indang resignation shiti yokba mapang ano Dutch nung coach, Roelant Oltmans Pakistan tongogo aser pa Asia Junior Cup atema national junior squad den Muscat-i ogo.

PHF-i sangdong ka ajanga Oltmans Lahore tonga aruba aser iba asayamung atema junior team len anitsü asoshi mapa agizükba metetdakja liasü.

Ajisüaka PHF-i, Oltman indang itasen shibai agütsütsü mesüra Aikman nem itasen magütsü aliba ya agütsütsü magütsütsü iba indang osang kecha magütsü.

Pakistan Sports Board (PSB)-i Dutch nung coach indang itasen agütsütsü ta ashiba sülen PHF-i Aikman shima liasü. Election aser temzüng ozüng dak sendakba nung PHF aser PSB na mangatetep adokba sülen state-i azüoka aliba lokti tentet yagi PHF nem senotsü teyari agüja aliba anenadok.

"Oman-i team yokba dena tenla agütsürtem aser sponsors tem dang nungi teyari meshia yoka liasü," ta PHF ketdangtsür kati ashi.

## Igor Stimac-i India team atema asayar 27 shimogo

**New Delhi, Monupii/May 20** (Agencies): Indian senior tebur football team head coach Igor Stimac-i, Bhubaneswar nung India team camp nung anogo ana tashi medical tests agiba sülen asayar 27 shimogo.

India team tang taruba Hero Intercontinental Cup (June 9 nungi 18) aser SAFF Championship (June 21 nungi July 4) atema renemshiba mapang ka lir.

Bhubaneswar nung Blue Tigers camp, kong Hero Intercontinental Cup asayatsü lir, iba camp ya May 16 nü tenzüik aser camp atema asayar 40 jaoka liasü, ajisüaka medical aser physical tests balala agiba sülen Hero Intercontinental Cup aser SAFF Championship atema asayar ajemshija tang asayar 27 shimogo.

Kasa mapang nung Vishal Kaith, Manvir Singh, Yasir Mohammad, Glan Martins, aser Roshan Singh nung yirur aliba atema team nung mezüngoksem.

Hero Intercontinental Cup masaya tashi India team Bhubaneswar nung maneni camp akatsü aser asayamung tembangba sülen parnok SAFF Championship atema Bengaluru-i camp belener aotsü.

India squad:

Goalkeepers: Gurpreet Singh Sandhu, Amrinder Singh and Phurba Lachenpa Tempa.

Defenders: Subhasish Bose, Pritam Kotal, Sandesh Jhingan, Anwar Ali, Akash Mishra, Mehtab Singh and Rahul Bheke.

Midfielders: Liston Colaco, Ashique Kuruniyan, Suresh Singh Wangjam, Rohit Kumar, Udanta Singh, Anirudh Thapa, Naorem Mahesh Singh, Nikhil Poojary, Jeakson Singh, Sahal Abdul Samad, Lalengmawia Ralte, Lallianzuala Chhangte, Rowllin Borges and Nandha Kumar.

Forwards: Sunil Chhetri, Rahim Ali and Ishan Pandita.

Head coach: Igor Stimac.

## Nüngtugu badminton asayar Chen Long asaya nungi anener



Chen Long

**Monupii/May 20, 2023** (Agencies): China nung nüngtugu badminton asayar Chen Long-i arishi küm 34buba nung pa asaya nungi anenba osang metetdaktsüogo. Pai Olympics nung gold medal ka aser world championship ana koker tang asaya nungi anenogo.

Taoba world number one asayar shibai 2016 küm Rio Olympic nung gold medal ngua liasü, paisa 2021 küm Tokyo Olympics nunga silver medal angu.

Iba sülen pa tang tashi nung khen danga asaya mali aser tang China nungersa nüngtugu asayar Lin Dan tsüingsü nung anidaka asaya nungi anenba osang sangdongogo. Lin Dan ya 2020 küm asaya nungi anena liasü.

"Asaya nungi anentsüba ya

ni atema kanga tasak lir," ta Chen-i Hokolbar aonung Weibo nung zülüja liasü.

"Iba ya ni atema kanga dang temulung raksaba mapang ka lir. Ni Chinese badminton team, ozü kibong aser fan tem dang kanga dang pelaba lemsateper.

"Ni badminton asaya kanga meimer. Ni kanga tia ka linük tenüng nungi national tola semer asayaogo, kechiyong taküm nung pungmang ajakbo mataloker," ta pai shisem.

Chen asaya aliba mapang takok tajung aika ngutetogo ajisüaka pa ya Lin-i amokbanger liasü. Ajisüaka pa yim nungbo pai takok tajung aika nguteta 2014 aser 2015 küm world title benogo.

Pai 2012 küm London Olympics nunga bronze medal nguogo aser medal sentsü ajak anguba sülen pa tang asaya nungi anenogo.

## BILEMDANGANG

Ali rongsen dak temulung alem dang nungibo  
Tsüngrem dak temulung alem tajungba."